

四庫全書

集部

欽定四庫全書

集部

可齋雜藁卷一
一至

詳校官庶吉士臣吳烜

主事臣呂雲棟覆勘

總校官庶吉士臣倉聖脉

校對官原任典簿臣郭祚熾

謄錄監生臣連彭年

欽定四庫全書

集部四

可齋雜藁

別集類三宋

提要

臣等謹案可齋雜藁三十四卷續藁前八卷續藁後十二卷宋李曾伯撰曾伯字長孺丞相邦彥之孫南渡後流寓嘉興邦彥庸材具位時有浪子之稱而曾伯則能以事功顯由著作郎兩分漕節七開大閩通知兵事所至

皆有寔績官至觀文殿學士集中多奏疏表
狀之文大抵深明時勢究悉物情多可以見
諸施用惟詩詞才氣縱橫頗不入格而要亦
憂憂異人不屑拾慧于牙後其雜藁編於淳
祐壬子續藁前編於寶祐甲寅皆有曾伯自
序續藁後為甲寅以後至辛酉之作不知誰
編考曾伯卒于寶祐戊辰則亦所自定也其
子杓嘗彙三藁刻之荊州湖北倉使劉夔又

刻之武陵咸淳庚午書肆又為小本刊行其
序即杓所作蓋其人其文並為當時所重故
流傳之廣如是也然三葉皆各自為編至元
嘉禾志始稱為可齋類藁蓋後人合而名之
殊非宋刻之舊今仍存三集之本名從其朔
焉乾隆四十三年七月恭校上

總纂官

臣

紀昀

臣

陸錫熊

臣

孫士毅

總校官

臣

陸費墀

臣

費

墀

墀

可齋雜藁原序

藁以雜名非純也余自弱冠共子職既而從諸公幙歷
中外泓穎不靈終其身吏俗中間隨事以酬應托意於
模寫自少而壯壯而老天闕剗藤者多矣其棄而醬蒙
藥褚不復可記憶篋中斷語零落本無足采年來憂患
摧折思致愈不逮前一日與書塾親友偶閱舊作一二
有勸以刊諸梓示兒曹者姑俾芟次之杜園綴緝淺近
卑陋終不及君房語譬諸山肴野蔌聊爾雜陳倘俎諸

五侯之鯖當踈然一笑淳祐壬子夏五旦日可齋書于
荊州杞梓堂

士君子生斯世功業文章其本雖一而不能兩全者天
也本朝功業之盛莫如韓范忠獻春雨桔槔之篇膾炙
人口至辨論新法一疏精於經術諸儒有所不逮而上
之人以出於強至疑之矣文正岳陽樓記精切高古而
歐公猶不以文章許之然要皆磊磊落落確實典重鑿
鑿乎如五穀之療飢與世之絺章繪句不根事實者不

可同年而語也可齋李公早以功業自許而詩文操筆
立就精妙帖妥夙出時流余曩與朝夕每歎其得於天
者厚一別將二紀而公功業赫奕於時一日貽書以其
在荆襄著述二編見示且曰蠹魚活計我尚願留情焉
余熟觀而歎曰功業文章難兩全久矣而公之志欲兼
之顧今邊事孔棘公以一身橫當荆蜀之衝屹然如長
城萬里上之倚公不啻韓范豈當復與書生文士校短
長於繩尺間哉諸葛孔明出師一表前輩以為與伊訓

說命爭光才德之盛固有不期然而然者此余所期公
於異日者也余既以此意復於公仍書以遺湖北倉使
劉和甫籤俾刊之編首益相勉勵以盡朋友之義云寶
祐二年龍集甲寅閏月上澣翰林學士中大夫知制誥
兼秘書監兼修國史實錄院脩撰兼侍讀尤焞序

欽定四庫全書

可齋雜藁卷一

宋 李曾伯 撰

表

代蜀總賀皇帝登極

鴻圖有永生上哲以應時龍德更新握休符而御極華
夷悅服宗社安榮竊惟以命舜而命禹者由歷數之歸
不之益而之啟者以謳歌之屬莫匪天人之與乃臻名
位之傳恭惟皇帝陛下緝熙光明聖神文武震雷未作

休聞已彰離日初升鴻聲遠播克承祖烈祇奉母儀豈
惟開平治之期將見廣規恢之業臣身逢盛際職守遐
方作之君作之師益綿統系莫非臣莫非土倍切懷愉

代賀皇太后

王謨烈啟後人罔輕付託帝孝慈奉太后式顯尊榮天
扶宗社之傳風動臣民之仰恭惟皇太后陛下令儀恭
肅柔德含洪母道增光詔孫謀而翼子聖躬膺歷為天
下以得人思齊遠繼于太任得位並隆于大舜益躋盛

美克壯皇圖臣濫綴外臺恭逢華旦身居劍棧愧抃蹈
之無從目睇觚稜惟傾瞻之采切

代賀郊祀慶成

九重肇祀黃宮推迎日之長五時用成蒼壁重禮天之
敬神人胥悅夷夏聳觀恭惟皇帝陛下順慶垂基體元
立極湯有一德為皇天眷命之符禹立三年正百姓遂
仁之日爰躬緝幄載見紫壇精忱寓藁稽之間和氣溢
豆籩之際宥民沛澤御丹鳳之端闈尊祖告功肅翠鑾

於清廟乾坤寧晏宗社靈長臣繆董賦輿濫兼郡鑰駿
奔百執莫違祇事於園丘釐抃一心惟替受釐於宣室

代賀皇太后

報本南郊謹小心而饗帝告功東闕新大典之承親慶
協神人懽騰海宇恭惟皇太后陛下離明麗正坤德靜
專位處時龍視舜邦于啟屣謀詒翼燕錫禹命以玄圭
屬泰時之藏儀宜慈闈之歸美一時雖肅永傳任如之
徽音千歲治安遠邁商周之丕祚臣吹竽粟輓越俎竹

符思助祭于臣工蔡傾萬里受介福于王母栢悅一心

代賀紹定改元

藏事國陽甫畢祠官之典更端歲統載新太史之編慶
格天人懽騰海宇恭惟皇帝陛下膺圖出震體道乘乾
審已察文允協舜璣之政卜年過歷益綿周鼎之休屬
紫時之肇裡命清臺而定歲謂紹興洪烈當昭祖武之
繩而嘉定成規盍繼孫謀之翼用重光于鳳紀斯永保
于龜圖臣給龜戍薇代庖符竹荷美名都顯號欣逢正

金史卷一百一十一
卷一
始之初揚偉績鋪宏休莫究無前之盛

代賀皇太后

五時藏儀天子展事親之孝一元謹始日官新紀歲之
文凡屬華夷欣同正朔恭惟皇太后陛下二南王化四
海母儀適駿有聲克贊武王之聖德肅雖在廟端由太
如之徽音屬皇邸之肇禋命清臺而更歷繩其祖武仰
循紹興英主之規詒厥孫謀上接嘉定真人之統更新
顯號昭示明時臣繆總兵儲濫兼郡守一宣漢旨蜀父

老以俱知三祝華封堯君民之共壽

代賀壽慶節

日舒南陸麗天占離位之重星拱東朝彌月闡坤珍之
瑞慈闈光啟寰宇歡騰恭惟皇太后陛下賢邁虞嬪行
齊周如遵燕謀而啟佑翊駿命以照臨子育羣生上體
高穹之眷母儀四海中存太極之神繼元祐之徽音舉
長寧之彞典茂膺純嘏益衍丕基華封祝聖人共喜堯
民之擊壤皇帝奉太后未誇唐殿之稱觴臣身繫賦輿

心馳象闕薰風入五絃之奏欣際阜財高岳傳萬歲之
呼永祚介壽

代荆閩賀天基聖節

舜璿始序王正開泰象之三禹紐發祥君位應乾龍之
五人欣熙旦世衍丕圖恭惟皇帝陛下剛健日新聰明
時憲隆漢基于億載新文政于七年禮備東朝問寢樂
龍樓之曉衣垂南面授民頌鳳歷之春對太皞之執規
慶孟陬之揆序惟天佑于一德有永歷年夢帝與我九

齡無疆嗣服臣護風于楚向日猶葵再拜稱觴阻預嵩
岳三呼之列中興作頌願賡江漢萬壽之詩

代賀皇帝御正殿

聖德無加于孝已臨純吉之期王位前正于朝端履太
昕之御宸居高拱寰宇聳瞻恭惟皇帝陛下克長克君
盡倫盡制雞鳴寢門之問悵慈極之浸遙鸞噦庭燎之
光略彝儀而未舉暨易織而紀旦斯負扆以答陽丕顯
離明式符乾健臣縻身邊闔矯首闕庭聽長樂之鼓鐘

阻陪星拱息甘泉之烽燭願護風寒

代賀誕皇子

珠躔聯彩楓宸陳亞歲之儀瓊榦叢休蘭殿毓皇支之
瑞慶流廟社歡浹宮闈臣聞兩明作離重暈啟日升之
象一索得震初陽應雷復之時肇國本以無疆知天心
之有屬恭惟皇帝陛下仁均動植孝格神明繼統守文
仰奉燕謀之翼垂基順慶丕承駿命之隆茲洪圖綿積
累之基果朱芾發嶷岐之秀祉流甲觀允開振振蟄蟄

之祥壽舉未央益遂怡怡愉愉之樂臣迹縻荆渚心切
華封子孫千億宜君宜王復見假樂太平之雅皇帝萬
年為父為母願慶元和聖德之詩

代襄閭賀誕皇子

離兩明而麗正如日之升震一索而得男與雷偕復義
符七鬯喜浹宮闈恭惟皇帝陛下孝格際蟠仁霑動植
人心天命有開遙駿之聲宗德祖功方懋延洪之業曦
馭茲臨于昴宿星輝宜動于尾躔雅播周邦本支肇文

王之百賦陳漢殿春秋小武帝之三基祚瓜繇華夷栢
悅臣誤叨重寄欣遇昌辰奉太后怡怡愉愉遙想龍顏
之喜宜爾孫繩繩螻蟻願虞舜羽之詩

代賀皇太后

尊推文母久詠思齊瑞啟湯孫有開長發慶闕九廟喜
對一陽恭惟皇太后陛下道極希夷神游冲淡蟬娟高
蹈舜心猶棄屣之輕燕翼親詒堯治拱垂衣之盛茲黃
屋遂怡愉之樂宜綠車啟岐嶷之祥世嫡承家奚遜甲

觀畫堂之瑞嵩呼稱壽益增未央前殿之歡臣迹阻楚
封心馳魏闕綿綿詠猷永延蒼錄之基采采歌采復見
關雎之化

江東漕賀誕皇子

離重明而繼照式對恢台震一索而得男篤生岐嶷福
綿九廟喜動六宮仰惟二祖開基千齡垂統載考流虹
之旦實皆紀亥之年謨烈之啟後人於昭丕顯元良以
正萬國聿應昌期恭惟皇帝陛下何寵駿龐詒謀燕翼

祖功宗德傳天下以為家帝命人心屬吾君之有子吉
占熊夢慶衍龜圖臣縻跡周原傾心漢闕星輝海潤有
開社稷之靈長華祝嵩呼但與臣民而鼓舞

淮西憲賀天基聖節

龍躔啟序泰爻開羲畫之三虹渚紀辰乾位應箕疇之
五華封載祝薄海同詞恭惟皇帝陛下輝光日新勇智
天錫守文繼統承祖宗熙洽之基申命用休衍社稷和
平之福緯延國算赫奕治功臣將指兵間馳心闕下淮

孺息警幸迎一氣之春回嵩岳齊呼驩聽三軍之雷動
廣西漕賀天基聖節

月臨太簇慶逢行夏之時天啟皇圖瑞紀生商之旦清
寧叶順率普祇歡恭惟皇帝陛下學進光明道臻悠久
嗣億萬斯年之歷服休命用申當二十七載之登平成
功高拱乾剛不息坤載無疆臣兼節南州馳心北闕凡
海隅之出日孰不葵傾與天下以為春同然椿祝

廣西漕賀正

虬漏平明布太乙東皇之令龍墀嘉會正九重南面之
朝泰道亨通乾端呈露恭惟皇帝陛下如天之覆何地
非春輔相財成獨運兩儀之化哲謀肅乂允諧庶證之
和斗杓載轉于蒼祇日轂永行于黃道臣猥司藩閫兼
領賦輿籍貢三朝敢嘆山川之遠壘傳萬里願令正朔
之同

荆閩賀收復襄樊

圖披南雍本吾國之封疆斷出中宸復舊時之城郭聲

揚師旅喜溢乾坤眷惟京右之區古稱天下之脊每念
蚡冒山林之如昔不虞駒支荆棘之至茲一陷腥羶幾
更裘葛固有撫故碑而涕者詎容以墮甑而視之宜我
聖明布昭神武命相臣而指授飭將士以前驅皇威一
伸舊物斯得臣謬膺闡寄幸奉廟謨撫南北離合之機
豈不揆時而量力當公私疲弊之際敢云抗表以出師
顧分義有所當為而事會誠恐易失倘為身慮則負國
恩端策拂龜賴一二臣之允協銜枚擁騎越六七日以

先登一麾而挹山甫之流風再鼓而洗羊祜之餘恨平
明整旆重賡營將之吟落日揚鞭猶記里人之賦豈臣
愚之能效皆聖策之有功茲蓋恭遇皇帝陛下授任不
疑好謀能斷念惟天惟祖全付豈宜玷闕于金甌曰有
土有邦在今皆欲整齊于玉斧堅持定見爰底成功然
始至未有百日之糧而後繫方當千里之饋分財用平
版榦非暫費何以久寧礪鋒必鍛戈矛必有備乃能無
患豫謹秋冬之計庶寬宵旰之憂觀趙鼎之奏謂必爭

所防敵釁餉岳飛之車使無闕其法祖規

荆閩進僖祖謚實

駿命萬年啟瘡源于涿郡龜書十字來珍貢于荊州德
應中天懼同下土竊以赤伏四七宜陽效祥紫蓋東南
江寧闡瑞觀史謀具嘉於往昔豈休圖虛出於當今洪
惟欽陵肇我炎祚謚定太常於建隆之始號加六室於
祥符之間鳳翥其章瑩矣溫純之質龍蟠厥紐美哉追
琢之工幾經劫火以不灰有待天河之淨洗致遺黎之

欣若望中國以來之想當修玉之時聿懷藝祖載稽遺
寶之歲允協寧王可占祖功宗德之無窮抑見天意人
心之有在茲蓋恭遇皇帝陛下丕承前烈宏濟中興宣
重光而襲緝熙育羣生而恢疆宇謂子孫必復其始趙
璧將奉以全歸茲帝王之興開先宗禮于茲而足證月
星明概海宇肅澄臣猥備閩謀幸陳廟獻離朱索而象
罔得端猶黃帝之珠后稷傳而天府司永作周家之寶

可齋雜藁卷一

欽定四庫全書

可齋雜藁卷二

宋 李曾伯 撰

表

代蜀總謝到任

萬里觀風方誤領梓東之憲六曹分屬乃今給劍北之師力靡遂於回天身幾容於亡地竊以坤維之重莫如井賦之難關中之積久之於粟紅渭上之耕半為之葦白矧從南渡尤倚西門及今百年之間不知幾變於此

井蛙內釁封豕外貪自開禧以來兵民財三者以俱困
凡紹興所置茶鹽酒一孔以不遺重以漏卮極於酒輒
二絲五穀農已剝牀一馬十牛軍未解甲月計不足歲
入幾何士方杞魯以視之人必蕭葛而可也伏念臣挈
瓶智小窺管材踈邊鄙艱難翻成螻磨江湖流落久負
鷗盟三年驚楚戶之霜萬里訪蜀山之雪甫持滂轡俾
會晏鞭僅能問米價於晉人不過收戶籍於秦府媵理
深疾正扁鵲之寒心血指汗顏雖屠牛而束手中朝過

聽外計驟頒炊沙作糜終無竒畫樵蘇後爨適有隱憂
匱已告於大農問徒勤於內史龍光赫若蚊負凜然茲
蓋恭遇皇帝陛下歷數傳堯謳歌之啟光紹延鴻之業
克承詒燕之謀遵修車備器之規方恢輿地念守邊積
粟之議尤重民天俯眷愚臣服勞先帝不以一介疆場
之吏付之四路兵賦之權謂臣以才以廉過加於褒譽
戒臣無病無餒使革於蠹源命播吳申恩隆乾覆臣敢
不勉殫綿力仰答明時癸巳于征庚戌告成願踵下武

繼文之績戊申奏上甲寅報可庶期孝宣興漢之圖

代謝皇太后

祥刑東劍曾微鞠草之勞護餉西門兼冒握蘭之寵祇
奉冥申之命悉歸坤極之恩惟蜀一隅去天萬里自渡
江已越于百載今宿師且及于七朞蚌鷓尚持蜂蟻猶
聚易一敵人之首不知幾縑費十耕牛之資僅絡匹馬
問雖勤於內史匱屢告於大農民嘆白催官虞赤立矧
方添於詔竈正宜問於晏鞭伏念臣僅有朴忠它無枝

巧雖皦皦之心如日而種種之鬢已霜州縣塵埃幾成
俗吏邊疆機會徒有壯懷一麾叨熊軾之華雙節問鶴
林之役

闕

五月

穀二月絲嗟瘡痍之未復三年艾七年病正膝理之是
憂會計徒上于元和方略莫陳于神爵誤頒宸綍遽總
賦興念蝸殼之涎久枯而龜背之毛難刮張弓勢極覆
轍憂深茲蓋恭遇皇太后陛下德贊乾元明彰離照王
化思齊之太妃母儀長發之有娥求賢審官佐先朝之

洪業理兵足食垂後世之良規俯眷愚臣嘗膺隆委遂率由于帝訓俾往給于軍儲自揣么微恐孤推擇臣敢不服勞薇戍圖報楓宸九賦斂民當體麟趾闕睢之意三軍作氣庶全魚麗鵠鶴之師

代謝郊祀肆赦

肅五時于漢壇用成熙事去三面于湯網誕布湛恩歡動邇遐德霑中外恭惟皇帝陛下與天同覆如日初升立極體元行宗社靈長之慶垂基永命本帝王欽恤之

仁屬宣室之受釐即端門而孚號鰥寡孤獨誰非舉手
加額之人動植飛潛不翅泆髓淪肌之賜臣遠聞草偃
喜切葵傾一代緝熙未遜詩書之盛十行寬大咸欣詔
令之觀

代謝皇太后

泰時八觚禮畢紫煙之燎細書一札令頌湛露之恩慶
集慈宮歡騰寰宇恭惟皇太后陛下道侔坤載力贊乾
綱有德克享天心屬新熙典介祉亦右文母遂及嘉生

虞庭當舞獸之餘漢網廣漏魚之患聿遵明訓誕布仁聲凡聞溟汗之敷咸仰解當之作臣偶兼使事祇播王言四海為家已均被蓂蕭之澤萬年介福將益綿瓜瓞之基

代謝明堂肆赦

合宮雲鬣百靈賓柴燎之儀細孔星流四海霈蓂蕭之澤歡騰中外慶浹幽明恭惟皇帝陛下守位以仁視民如已祈天永命悉遵累朝忠厚之規饗帝事親爰舉一

代緝熙之典茲受釐于紫幄乃肆青于絳幡沙漠烏孫
豈但聞風而棄過潢池赤子亦令與日以自新臣遠在
戎薇欣同偃草若時蜀道歡傳諭檄之文願與堯民共
覩畫冠之化

代荆閩謝加煥章閣因任

楚藩作牧曾無補于分毫堯閣陞班迺俾仍于方面籲
天莫避踏地知慙竊惟中興擾古之規遠在上界藏書
之府文章煥有與雲漢以昭回方策舉行即羹墻之親

見祖述已然之龜鏡經營未一之服圖宜有鴻儒克承
龍渥某學非用世材不逮人一第奉常已溢布韋之分
十年幕府無裨樽俎之疇謨蒙旒冕之深知猥備疆陲
之煩使內聯省寺外玷節麾繼寓直于禹謨獲承流于
周翰力小任重猶蟲蠹而負山政拙心勞甚精衛之填
海矧當連年一水二旱之後不勝吾民千瘡百孔之憂
許寬歲時姑苟旦夕丹心報主雖惟知國爾之謀白髮
奉親未免動家馬之想敢期新命俾領舊邦載陞奎宿

之躔不易軫星之分僥踰越望俯仰銜恩茲蓋伏遇皇
帝陛下剛健日新聰明時憲雞鳴問寢昭慈孝於兩宮
燕翼承休垂典章於萬世廼顧荆襄之形勢將恢建紹
之規摹稽大訓于寶書獨詳戎備貳洪名于玉帳庸示
睿衷遂使微臣亦叨異數臣敢不弗移故步益謹初心
潁川一歲之留雖有慙于子翼江漢萬年之祝願有似
于召公

代謝皇太后

十連固效敢期陟舜岳之明一札示留乃俾寓堯章之
直誕敷渙號繇出坤闡臣聞錫壤中邦重四方之屏翰
寶書大訓垂萬世之典謨苟惟乏已試之功何以被維
新之命臣一叨末第百不如人生長窮邊雖功名早以
自許奔走下隸謂分量不過若斯十年幕府之棲遲再
命麾輅之踰越省蘭位棘繼陸鴛鴦之行營柳戍薇載
董纒緜之旅第用班超平平之策幸臻陽城下下之書
然而早潦中更星霜六歷政以鷗盟之清夢有闕烏哺

之私情雲漢九天敢意晉圖書之府風烟萬里仍令貳
轅帳之權何所飭修有此際值茲蓋恭遇皇太后陛下
心游太古道運無為繩祖武于累朝示母儀于萬國詒
謀燕翼業方啟于顯承求賢審官志素存于輔佐將取
中興之謨略大恢外治之規模遂使愚臣亦叨聖渥臣
敢不恪勤夙夕圖報消塵竊比潁川雖愧神爵鳳凰之
日願令江漢益彰闕睢麟趾之風

淮西憲謝到任

充閫僚於江左莫贖中權司臬事於淮壖誤將上指况
俾晉丞於武庫復叨陪議於軍營祇命惟新撫躬莫稱
伏念臣地望俱下天分不高疆場半生險阻艱難之備
歷家門多難零丁孤苦之僅存每惟世受於國恩靡憚
身先於王事風霜久薄齒髮早凋比一札之起家預十
建之命佐了無末議可補前籌敢期升蘭錡之班遽獲
玷軺車之選且令列屬其贖視師聯唐相之鑣文墨敢
儕于韓愈持漢使之斧威名尤慊于勝之屬方董虎旅

之征固敢狗鷓原之急戴天恩厚踏地慚深茲蓋恭遇
皇帝陛下治舉修攘仁宣欽恤當茲大刑甲兵之間正
切顧憂寵以小雅禮樂之華不經臨遣爰疇咨于政路
併共二于戎行臣敢不肅奉條章勉殫規畫布之蠻貊
俾知九重惻怛之心于彼隰原誓竭一介驅馳之力

淮西總謝到任

乘傳東臺僅及轉江沱之漕升班左戶遽令峙天塹之
糧請莫遂于再三職乃叨于共二感恩隆厚服命兢慚

竊以江淮財賦之淵素推前代廟堂錢穀之問始自近年蓋由疆陞耗于蕩搖根本虧于朘削邊農廢業壽昌之斛糴弗行私鬻害公劉晏之鹽權亦壞楮幣輕而莫知措手米艘截而有類楹吭炊沙未易以作糜捧卮詎堪于沃釜有洛陽處士將哀痛以深憂非江左名賢豈清談之可辨如臣者蹟寒寡援分薄多艱齷齪泥塗何有濟時之略驅馳塞漠未殫報主之忠自憂患之重心幾功名之絕念迭更使轡猥玷卽闡鼠河腹之已盈狐

丘首而是望不圖思紆驟昇賦輿惟前車之戒未逞而
後爨之憂愈亟膝理深疾正扁鵲之寒心血指汗顏將
屠牛之貽笑龍光渥矣蝨負凜然茲蓋恭遇皇帝陛下
綜核臣工修明軍實豐財和衆聿新外治之規模立政
用人宏建中興之事業愛惜日力選拔時材知臣久在
戎行險夷備歷謂臣曩承父訓調度粗知遂俾庸流亦
叨煩使臣敢不勤勞凡職精白承休諾首山庚癸之糧
願竭懦衷而經畫秦湟水寅申之冊敢祈淵聽之矜容

江東漕謝詔書建督府宣諭

命丞相以董師肇新督鉞遣使臣而有禮例被詔論奉
睿旨之丁寧撫懦衷而激烈維昔姬旦任東征之貴吉
甫專北伐之權十夫圖功尚形大誥之訓三事就緒猶
勤常武之詩蓋當疆場多壘之時必賴臣子同舟之濟
星馳一札風動四方恭惟皇帝陛下廣舜武文錫湯勇
智始勤終逸全采薇天保之規模內修外攘懋吉日車
攻之事業憤裔夷之肆侮建征府以宣威爰飭小大之

臣各勉驅馳之力臣敢不仰祇列命益竭愚忠聽山東之書士卒且思于共奮上淮西之雅朝廷行慶于太平

淮閩謝宸翰獎諭

癸卯兵退

成役外攘僅遁風寒之責恩言下逮過形雲漢之章服命先榮將躬激烈伏念臣猶習為吏未嘗知兵不待人言懼忝祈父爪牙之任適有天幸乃當季龍骨肉之爭慮敵侮之仍窺奉宸謨而先發樓船東下瀚海颺回虢旅北征汴河響應猶鳩張而突至條鼠竄以亟旋良由

我勢之扼吭足使彼謀之掣肘秋聲早寂少休鴻雁之
民畫捷委馳端賴熊羆之士微臣何力溫詔遽褒茲益
恭遇皇帝陛下深略緯文有常立武佑者順助者信開
皇天欲治之期彼以暴我以仁撫異域將衰之運操成
功而不有揆睿藻以肆頌然而中原之機會雖來萬里
之戎情難測蚌鷁相持固為吾利豺狼不噬其可謂仁
毋近狃于膚公願益加于聖慮臣方圖解戍擬丐歸田
平淮西紀蔡功所願上韓愈之雅使河南皆晉土政須

擇祖述之才

淮閩謝宸翰獎諭

甲辰解
壽園

聖策有功釋嚴圍于邊壘間臣何力拜溢獎于宸奎沐
寵優隆拊躬危慄眷是州來之舊扼于淮浦之衝謝玄
昔臨此以却淝水之堅紀瞻亦據此以走葛陂之勒古
今要地南北必爭自再隸于版圖嘗一新于城邑蛇豕
荐食旅復荒殘狐狸所嗥未遑經理比奉廟謨而載葺
正虞邊圉之肆窺孰云乘春水之未生乃至及南風而

猶競橋中流而據險柵兩岸以分屯鋒蝟斧塘逞其羣
醜釜魚幕燕凜若孤墉凡茲貽宵旰之憂寧免受春秋
之責臣才疎守鎗勇愧屬鞬雖重門擊柝之粗周恐被
髮纓冠之弗及不能以日所恃者天幸而將一乃心籌
不驚於夜唱士百其勇勞靡憚於暑行舟師登岸以夾
攻騎旅斫營而追勦草薶禽獮既執訊之連連鼠竄獸
奔屹全城之頌頌君之訓也臣何功焉茲蓋恭遇皇帝
陛下密運神機於昭聖武烽火連於三月雖睿算之上

勤干羽格于七旬終戎心之自革操成功而不伐發明
詔以肆頒臣敢不仰體丁寧深加勉勵第三復必守之
訓將大為先具之防光陰無多事力有限必得勝兵之
三萬與夫積粟之一年則我庶幾鑄脚之安而彼豈敢
靴尖之侮上金城之畧更須求充國之才動玉關之思
願俾遂班超之志

淮閩謝詔書獎諭

同諸將帥

干城獻凱責粗道于封疆賜璽示褒恩遍覃于營壘十

行誕布羣聽具孚竊以淮右之區壽陽為重內則蔽遮
于餉道外而遏截于敵衝當版築之甫周條敵圍之肆
合所賴將士戮力戎醜畏威愬武古通分三方而並進
蘇享李蔡罄十萬以齊呼雖始貽盱食之憂而終奏晝
同之捷臣忝司戎律肅奉皇靈僅能卻敵以全城不過
因人而成事宸奎載錫華袞增榮茲蓋恭遇皇帝陛下
聖武布昭神謨密運赫怒整旅震萬里之天聲序情閔
勞作三軍之風采微臣何力溫獎幸頒臣敢不祇若訓

詞廣宣德意如雷感動已同士卒之懼未雨綢繆益謹
藩籬之備

謝臣寮上言降一官

分間積愆幸曲從于薄責杜門省已忽再致于煩言非
聖明赫若以鑒臨則么麼凜乎其危殆罰輕恩重感極
涕零竊惟公論廢置實繫乎朝綱私情是非則闕乎天
理昔馬援以武陵之役梁松陷之終身王尊以京兆之
勞楊輔擠之非罪類皆據其宿憤曾弗念于厚誣每思

古人猶有餘恨臣不幸孤危之跡適墮朋比之科闕二
紀于官塗靡憚捐軀而報國徧三邊之會府豈專阿意
以從人僥踰尺寸以孔艱祇懼簡書而敢犯凝旒過聽
授鉞于征猶蟲蟲不足以負山而蛇豕屢當於犯塞網
繆陰雨涉歷星霜奉廟算之有靈保邊封之無失豈謂
東知之過厚致聞媚忌之兢生雖譴不可逃以牽連而
及已然疾之太甚則媒孽之有人

闕

交情本無於他憾職業不能

以苟同其於彼時皇恤異日欲報怨之以直豈加罪之
無辭然而意不疑盜金則具存府藏之籍曰虞公求玉
殆誤聞道路之言邊報必以實謂欺則無利權歸之公
謂貪其可使冉求果附益詎能當小子鳴鼓之攻以曾
參為殺人心欲啟慈母投杼之惑嗾從風旨扇使謠言
不思張奐坐梁冀免官存皇甫交舊之薦乃訝僧孺付
張鷟代去從德裕私怨之傷罪狀如斯刑章曷逭恕而
孰不可恕誅之幾弗勝誅賴淵聽之昭回賜宸奎之處

分免投四裔僅削一階當山嶽動搖草木無不摧折俄
雷霆威霽雨露轉而涵濡釋大戾于鼎鈇脫微生于蠶
粉過深擢髮德厚淪肌茲益恭遇皇帝陛下總攬權綱
作新政治揭日月之明而畢照恢乾坤之量以蕪容甄
別忠邪雖衆惡而必察燭知幽隱憐一介之無他力賜
保全務行寬貸臣仰戴無私之造猶虞不測之淵非容
如地蓋如天焉保負荆而免咎凡生之年死之日誓圖
結草以酬恩

謝再降官

時奉御札李某連年守邊粗無他失若加竄斥何以勸後可與鐫一秩

榆邊夙譴賴聖造之兼容栢府新除復煩言之首及凜
人心其可畏幸天語之曲回薄責僅加隆恩深厚竊以
罰而當罪國憲難逃議匪徇私輿情斯服仰稽前志遠
想古人伐讐者弗及公敵怨者不在嗣誰毀譽而行直
道仲尼所以深思以眊眊而入黨人漢史為之竊嘆孰
謂紀綱之要地乃先蒂芥之小嫌伏念臣父先臣某嘗
任蜀憲方其去當時稂莠之害豈暇為後人荆棘之憂

亦既歷時適相參會緣臣比共武服上累宸旒匆遽初
年突若敢彎弓之人周章末路輕于不俟駕之行中因
疾以丐歸嘗抗章而予告茲人言不一謂臣罪凡三獨
蒙黼扆之深知獲免藁街之加戮丹書未洗白簡再騰
寂然已冷之灰殆無影響甚矣將枯之骨幾委炎荒正
大聲無自以呼天而五體甘為之投地幸乾坤清穆日
月無不照臨雖雷霆震驚雨露轉而潤澤遂逃深穽姑
削微階昭回十有六字之奎章萬世傳誦報復二十五

年之宿憾一旦開明保全孤立之危蹤銜戴再生之大
賜銘恩浹髓感涕交頤茲蓋恭遇皇帝陛下德並兩儀
光被四表權輕重之宜而應變躬予奪之柄而馭臣建
皇極以布斯世之至公了無偏黨用人物必察平時之
大節明示勸懲如臣此心惟帝所鑒不忍俾陷縉紳之
禍以其嘗更介冑之勞悉畧短長務全終始臣當夙宵
省咎香火酬恩雖鳧雁之在江湖寧有忘機之日倘犬
馬未先溝壑無非結草之年

可齋雜藁卷二

欽定四庫全書

可齋雜藁卷三

宋 李曾伯 撰

表

謝廣西經略使到任

三載黜幽甘投閑於東里再命作牧俾祇役於南邦循
墻靡徇於愾辭入境具宣於德意俯慚忝竊仰戴生成
睽桂海之奧區介蠻徭之絕徼昔稱樂土今視並邊既
獸蹄之跡可通豈馬腹之鞭不及迨天之未陰雨責及

是時如人之護風寒何止數處况藩落賴烏孫之犄角而潢池易赤子之跳梁匪惟豺狼之不仁抑亦蜂蠆之有毒聿寬憂顧正費圖回我方隄度以制敵之淺深彼且園視以覘吾之虛實情偽頗滋於互市用度浸竭於牢盆民皆戴白而不知兵吏每拱默以幸無事欲先自治宜屬重臣如臣者已試罔功何能為役征鞍陳迹不堪臆于闐山發緯寸心猶未忘于畝畝自弗容于公議謂永棄于明時朽木垂凋老將至矣鉛刀再割誰復使

之賴皇恩曲賜之保全然愚分詎希于投拭修頌新綵
盡復舊壇祠庭甫玷于親除藩服遽膺于申命東知至
厚奔走奚辭爰觸熱以問行茲飲水而就列念三邊形
勢險阻固備嘗之苦五筦事情夢寐所不到此被龍光
而榮甚顧螽負以凜然自揣疎庸若為稱塞茲蓋恭遇
皇帝陛下明見萬里德照百官在知人在安民聿崇先
務不泄邇不忘遠獨運宏謨將令八荒如在畿甸之間
弗以一肯而棄封疆之士致叨誤渥仍畀幹方臣敢不

激勵乃心恪恭厥職立銅柱以布威德敢希馬援之功
至金城而上便宜願倣營平之奏

謝兼廣西漕

遵誨以南曾未幾于作牧從天而下俾共二于將輸揆
微分之僥踰感隆恩之渙厚伏念臣材疎弗穎器小易
盈起廢拜州賴主知之未棄扶衰度嶺顧王事以奚辭
提封遠在于一方惟政甫更于三月暫令給餽正愧代
庖既各有于司存其敢云于近比略無報上迺畀兼人

眷西漕之攸分實外銓之所屬熬波出素關百貨之贏
虛輓粟腐紅繫三軍之調度專其任猶虞于曠闕選諸
衆盍付于英髦赫若龍光歛然蝨負茲蓋恭遇皇帝陞
下照臨若日溥博如天加惠遠民視每同於畿甸誕宣
明指遣尤重於隰原遂叨委寄之榮曲示通融之力臣
敢不於斯二者謹乃一心此蕭何寇恂佐漢之宏規豈
臣敢企守馬援葛亮撫蠻之舊地賴國之靈

謝京湖制置使到任

授鉞以南南服巖關之役改轅而此且加邃閣之華揆
分踰涯感恩隕涕睽惟全楚中立並邊自春秋而號經
營用武之區歷魏晉而為馳騫爭衡之所拊英雄之陳
迹慨今古之殊時金湯千里雖若覆盂瓦礫諸城幾如
墮甑方將興耕築以植上流根本之計輯蕃漢以繫中
原豪傑之心匪得英材曷副妙東如臣者迂疎淺識牢
落孤蹤備更鞭弭之勞略無報效盡釋簡書之累賴有
鑒臨方賡一冬炎嶺之吟詎作六月太原之想從天而

下易地則然城郭重來猶記人民之舊山河無異祗驚
風景之殊矧當夏潦之非常且值秋聲之已逼老馬雖
粗知于故道鉛刀恐莫發于新硎凡此生成若為稱塞
茲蓋恭遇皇帝陛下躬持乾斷掌運坤輿惟天全付予
有家將復祖宗之業無日不申做諸國疇咨文武之臣
肆頒細札之丁寧密示成規之經理謂其已試俾爾來
宣臣敢不勉竭愚忠恪遵聖訓上策莫如自治謹當蔽
護于風寒明主可為忠言願益綢繆于陰雨

謝蕪湖廣總領并京湖屯田使

受任幹方一其可再護耕董餉二者得兼上恩昭示于
通融小已深增于激烈伏念臣猥蒙拔擢游玷蕃宣猶
童子而舉烏獲之鈞方虞弗稱以庖人而越尸祝之俎
豈是能勝敢期眷倚之有加不以庸愚而就畀既給庚
癸之呼且修戊己之屯祇誦王言方愧處遜瑜之任載
思使事正須付蕭葛之流已試何功兼收並用恭惟皇
帝陛下獨持睿斷不顯皇靈國家刑政之明深懷牖戶

錢穀甲兵之問每飭廟堂顧非共二之材亦被錫三之
寵臣敢不勉殫駕技仰報鴻私將令秦湟水之勳未能
暮月若曰課峴山之績願俟季年

謝轉正議大夫

平黎
寇賞

潢池肆擾奉王略以格姦丹宸疏恩陟文階而示獎循
墻莫避跼地奚勝伏念臣頃蒞桂封適乘黎警動干戈
於邦內伐以何為賣刀劍於海瀕安之而已姑遣師而
揚武果納款以請降皇靈所加臣愚何及敢謂論功之

次例膺增秩之褒奮漢將之樓船慚微顯績施隋官之
門戟濫被新榮茲蓋恭遇皇帝陛下德奉三無明照九
有恩威並用得龍蛇赤子之拊循慶賞誕頒極犬馬老
臣之勞徠雖其已去猶且弗遺臣敢不精白承休寵洪
載賜付卿南方事愧未清嶺嶠之塵寬上北顧憂茲願
罄封疆之責

謝除寶文閣學士京湖制置大使

睽錫壤之中邦僅還舊物司寶書之大訓俾荷美名靡

容累疏之控辭曷稱明綸之加獎凌兢祇命感戴填膺
伏念臣本乏技能誤當委寄輒環幾老悵朝華之已披
鼓至再衰懼暮氣之將惰由桂林之奉詔來荆渚以于
蕃惟祖宗全付予家自宇宙便有此峴畫遵玉斧缺補
金甌朝廷惟庾水意同嗟何及矣公卿豈營平議是孰
與守之其敢望於階升暨所居之官大夢寐九天之隔
忽到邃清封圻十國之連增雄廣永職仍共二恩厚函
三茲益恭遇皇帝陛下獨運離明於昭乾斷圖回區宇

幾同行酒而議太原慨想人材何啻每飯不忘鉅鹿茲
聖策有功而底定顧愚臣何力以叨榮臣敢不拜手承
休鞠躬盡瘁固辭南城郡得無愧羊祜之心願入西域
關所冀憫班超之老

謝除龍圖閣學士依舊職

揆江漢之雅藩翰何功占河洛之符論思進職循墻罔
避連茹叨榮臣聞彥博鎮秦如膺真授仲淹分陝僅以
直除豈惟彰儒者之華實以重邊臣之體如臣者素非

清望猥荷殊知跡涉揚荆兩玷元戎之寄光依奎壁四
聯學士之班正虞胤枝之五窮倏被龍文之三點從天
而下誕頌溫潤之辭為日幾何再陟凝巖之秩遭逢千
一感戴萬斯茲益恭遇皇帝陛下剛健體乾裁成用泰
舉歲終羣吏之會爰飭周官當月旦四岳之咨以新舜
治致令塵瑣亦與階升臣敢不拜手揚休捐軀效報圖
陳湟水倘遂畢于馳驅夢入瀛洲願許承于顧問

謝轉正奉大夫

和程
賞

朝家廣塞下之儲未嘗靳賞計吏辨湟中之糶何足言
勞遠膺增秩之榮祇負踰涯之愧伏念臣猥分戎翰兼
董賦輿問晉人之米價若何幸皆樂售給漢闕之糧道
有此粗免乏供猶斗升之水僅蘇豈尺寸之地敢望奉
寬一分之詔惟恐失之叨正三品之階斯為過矣綸言
垂獎綿力增慙茲蓋恭遇皇帝陛下明足食之大經先
備邊之急務俾與民為市斷無穀貴賤之傷農凡爵人
於朝必以功重輕而示賞遂令鬼瑣亦忝寵綏臣敢不

刻骨銘恩縻軀誓報倘首山相呼自今飽于宿師恐鉅
鹿不忘其上寬於盱食

謝男杓除措田令兼制機

護師外閫慙微橫草之勞分命底僚猥及荷薪之子聯
鵠誤渥舐犢銜恩臣矐兵機當弗容間之時而屬掾許
不避親之舉必祁午可則祁奚進之勿疑非魏戌能將
魏舒置而靡用眇焉無似彼此曷勝伏念臣疲甚守邊
男臣杓癡未了事殆猶阿買僅堪使寫以張軍敢謂添

丁果遂充耘而為國既特徇幕府文書之辟復令陪奉
常弟子之員方載鼉以車愧莫稱便蕃之寵俾沐猴而
冠才幾出假借之私茲蓋恭遇皇帝陛下以父母心作
民物主仁之至義之盡隨小大以用人老者安少者懷
與高厚而合德致令弱息亦玷殊休臣敢不益謹教忠
使知由禮驅之千畝必能奉東作之勤瞻彼方城豈敢
望西平之績第相告語誓竭報圖

淮西憲謝賜歷日

武監綴班誤玷皇華之節清臺頒序寵兼細札之書歲
月肇新吏民胥抃恭遇皇帝陛下仁參化育道妙財成
格庶證以致和熙百工而凝績漢正誕布羣方同慕義
之心周歷嗣承千歲衍垂基之慶誕修人紀敬授民時
臣恪掌刑章謹宣德意奉行詔旨載揚春日之寬申儆
邊防願備秋風之急

淮間謝賜曆日

象闕放常誕布萬年之曆蝟淮率職恭承一札之書凡

在幅幘舉同正朔恭惟皇帝陛下體元御歷審已察文躬一德以享心與天同運撫五辰而凝績如日之新律布青陽軌循黃道臣敢不對揚休命敬授人時三年有成愧乏守邊之効一日必葺誓殫報國之忱

桂閩謝賜曆日

賜書北闕君臨用九之乾授歷南交民遇登三之泰丕昭王度協用人時恭惟皇帝陛下道妙範圍仁參發育新日而又日益加行健之剛後天而若天克謹履端之

教璿璣順序玉燭致和臣敢不祇服蕃宣奉行寬大仰
占鷄尾相安禹貢之山川遠暨龍編同稟漢家之正朔

桂漕謝賜歷日

歲應三登載紀清臺之歷文成一札聿頒方國之書式
謹邦條以前民用恭惟皇帝陛下與天同運如日方中
審已察文翼小心而事上帝勵精為治建大政以興太
平律播青陽軌循黃道臣敢不對揚休命敬授人時魚
夢維豐願協金穰之應鯨波不動敢期冰解之勲

荆閩謝賜歷日

辛亥

江漢來旬猥任周疆之舊隅夷賓日誕頒堯歷之新四
達成書一遵彝令恭惟皇帝陛下體天行健受命溥將
四七際之珍符有開景運億萬年之寶祚立闡重光况
側身銷變之餘正恭己當陽之暇春回黃道閏課清臺
臣敢不欽授人時聿宣王度雲章昭若威無咫尺之違
日監在茲陰謹寸分之惜

荆閩謝賜歷日

壬子

紫塞護寒甫畢防冬之候清臺頒朔又逢行夏之時四
達乾文一遵常令恭惟皇帝陛下法天不息嗣歷無疆
咨汝義敬授人時曰為改歲命冢宰通制國用何待來
年未雨而先綢繆無日而不戒懼俾恭爾事爰示此書
臣敢不恪謹布宣深懲翫愒聽首山之庚癸正急軍儲
數湟水之寅申願承聖策

江東漕謝彗星降赦

乾文示戒軫睿慮于昕朝解澤除瑕賜寬書于方國驩

騰八表和召兩間恭惟皇帝陛下濟括文明嚴恭寅畏
在璣衡而齊政聿謹厥修菲飲食以卑宮敢淫于樂既
廣開於言路尤勤恤於民生誕布湛恩潛消咎證臣濫
兼使指祗奉詔條貫索沉輝咸與洗心而滌穢攬槍絕
跡願觀轉異以為祥

荆閩謝宣賜夏藥

庚戌

六月飭戎猥玷中權之寄十行賜札遠蒙上藥之頒假
寵優隆拜嘉激烈伏念臣罔功嘗試多病早衰五嶺烟

嵐正作痛瘡之賦七澤雲夢又為襜褕之行甫躬錫壤
之初崇賚寶奩之實珍良博濟疲忝頌蘇茲蓋恭遇皇
帝陛下視民如傷躋俗于壽禹疇攸叙徵臻燠若之休
舜治無為愠賴薰兮之解誕施嘉惠俾衛微生臣敢不
祇荷眷慈勉殫勞瘁講求民瘼庶無咨暑之聲消弭咨
邪共罄惜陰之力

荆閩謝宣賜臘藥

庚戌

采薇守衛當北尺之寒時尚藥匪頒被內廷之溫旨對

揚隕越捧戴凌兢伏念臣質令且孤品難共二水淺土
薄嗟一方之病未蘇歲晚風高正六尺之軀當護敢期
睿眷特軫支離珍劑實匱俾禦折綿之候綠綈賜璽頓
回挾纊之和畫錫光華夙痲蠲愈茲蓋恭遇皇帝陛下
躋民仁壽保治平康理國猶身視郡下瘡痍而若切以
恩撫士念三軍輓瘵以不忘肆覃露湛之仁庸勉雪霏
之役臣敢不服之無斃庶其有瘳願畢凋年不敢體膚
之愛力扶疆證庶消媵理之憂

荆閭謝宣賜夏藥

亥 辛

上游護閩值周雅之飭戎中禁疏綸按炎經而分劑恩
淪弱質感激懦衷伏念臣役久暘侵政多痞悶視南夢
北雲之域人浮困于產鼃當下潦上霧之時師幾疲于
汗馬敢期溫旨爰軫暑行錫之尚藥之珍良藉以精鏘
之璀璨一沾施濟盡滌鬱煩茲蓋恭遇皇帝陛下德並
離明道同乾健生育長養以為事仁哉天地之心痒疴
疾痛若切身壽此邦家之脈肆攷嘉賚俾衛微生臣敢

不竭力幹方疚懷報效銷民聲之咨雨庶其有瘳厲臣
節之飲冰服之無斁

赴荆閩謝宣賜金器纈羅香茶

易地幹方猥任上流之寄自天錫寵肆頒內府之珍德
厚淪肌感深填臆伏念臣本無他技幸際明時疆南海
以承流未殫微效國西門之作牧誤被親除比甫見以
吏民顧曷酬于君父忽膺密旨加賚豐儀異馥芬芳生
清風于茗椀精鏐璀璨疊香雪于衣梳昭宸眷之優隆

煥綸言之勉勵龍光俯逮愚分奚勝恭惟皇帝陛下德
照百官明周四表求文武如不及爵以勸功送禮樂遠
有華予以馭幸遂令塵陋亦被恩榮臣敢不拜手登嘉
鞠躬思稱凡服用之頃永言何日之忘惟薰淪其中以
報如天之賜

謝特賜香茶縷金花

上流承乏條逢夏五之書中旨傳宣恭被晝三之錫詫
榮凡目增盛懦衷伏念臣猥備驅馳每慚玩愒時辱軫

懷于邊役過勤頒賚于尚方郁散龍煤帶御爐之霏霧
珍分鳳夸來官焙之清風藉之奩金夏鑄之精侑以剪
綵春工之巧辨儀鼎重睿眷益昭茲蓋恭遇皇帝陛下
序情閔勞以予馭幸高拱離明之正如日方中遠揚渙
汗之充從天而下自惟庸瑣曷稱優隆臣敢不滌慮薰
心斂華就實無一毫而非君賜何以將之惟終身而荷
聖情未知報所

謝特賜銀絹

逢震夙之期職修篚貢頌晉晝之錫禮重幣餘示外服
之光華極中扃之愧懼臣任分方岳報乏清塵頌江漢
之萬年瑞開電繞效荆衡之三品枕寓風宣幸沐優容
敢圖蕃賚侈精鏹之交祭與彛帛以橫陳恩厚如天感
深無地恭惟皇帝陛下垂衣而治所寶惟賢市駿馬骨
以千金感名翁來於國士易敵人首以一絹經營足繼
於祖規顧惟何功拜此大賜臣敢不祇承寵渥勉勵愚
衷解以衣韓豈但詫一身之飾捐而問楚庶幾得萬里

之情

謝宣賜香茶

薇戍罔功方忝便蕃之錫梅壬在候又頒芳潤之珍服
命優隆感恩激烈伏念臣再鼓愈淡一畫無奇字國金
湯類鄙窮儒之臭味屬時烽火曷驅醜類之腥羶忽月
團分官焙之餘而煙縷輟御爐之賸來由黼座藉以寶
奩洗苑勃于塵心侈光華于凡目茲益恭遇皇帝陛下
因時行惠以禮遇臣明德惟馨格遠人於萬里大亨以


養來賢士于四方致使孤蹤亦叨殊賚臣敢不望咫尺
而下拜銘寸臆以中藏嘉與戎行無載渴載飢之嘆恭
辭若賜有三薰三沐之辭

謝宣賜臘藥

辛亥

一札細書遠下楚熊之域萬金良藥聿來周蜡之時聖
惠優隆愚衷激烈伏念臣徒勞寢老再試罔功蒙犯風
寒固知與士卒而同甘苦因仍水潦未能使田里之無
嘆愁敢期濟衆之仁俯賚衛生之劑出綸錫畫挾纒回

春茲益恭遇皇帝陛下視民如傷使臣以禮布德行慶
元元庶有瘳乎序情憫勞溫溫和可知矣遂令疎逖亦
被匪頒臣敢不稽首拜嘉鞠躬盡瘁維持弱質頓喻丹
砂赤箭之儲歌詠殊恩願續翠管銀鬕之句



可齋雜藁卷三

欽定四庫全書

集部

可齋雜藁卷四

五

詳校官庶吉士臣吳烜

主事臣呂雲棟覆勘

總校官庶吉士臣倉聖脉

校對官原任典簿臣郭祚熾

謄錄監生臣連彭年

欽定四庫全書

可齋雜藁卷四

宋 李曾伯 撰

啟

代蜀總賀史丞相拜太師魏國公

大庭播告上袞登庸定鼎相成師禮重周公之德分圭
啟魏國名嘉畢萬之封昭宗臣佐策之勳示明主報功
之寵古今盛事中外歡心竊以六典作姬首三公而始
置首官表漢非一職以為稱自尚父得於磻溪而子房

奮於黃石寥寥千載落落幾人迄我皇朝尤為曠典惟淳化真人之紹述禮趙普以勲勞至元祐天子之幼冲拜潞公以年德中興而後未見如斯考國史之所聞獨會稽之先烈然在孝廟十年庚戌之旦始疏魏社之封迄于光皇三月甲寅之辰初演師坦之命非以欽崇於舊學則由擁佑於重光方蔚為寶訓之首稱况繙以金甌之全美超前越後僅有絕無恭惟某官社稷重臣國家元老正權綱于聖化更張之日運籌策于王室規恢

之時事能應物能名持著龜之先見剛不吐柔不如存
金石之誠心坐扶茂陵三十載之治功益行炎祚萬億
年之休命赤鳥獨隆于左右黃旗浸盛于東南屬開歷
數之紹堯方卜謳歌之歸啟天擎鼇柱金滕藏代武之
書日洗虞淵玉几任保康之寄遂定一代延長之計克
彭兩宮仁孝之忱以至義質鬼神息四海鷓鴣之難信
行蠻貊格五胡狼虎之姦國勢無山岳之動搖人心有
松柏之茂悅矧登鴻碩叶贊燕貽奉廣如之徽音伏繼

文之不烈屹然於從容密勿之頃隱若有憑藉維持之
基斯克享于天心宜莫隆于人爵竊聆奎翰親發玉音
道慈訓之丁寧示元勳之尊顯謂先朝眷倚之意當示
褒崇而今日擁翊之功豈容謙抑所以彰兩朝不世之
績慰二祖在天之靈異數肆放僉言惟允山川世胄方
益增茅土之封巖石民瞻當愈重槐庭之位然且秉樞
機之周密運鼎軸之尊安被之詩歌宜在蒸民崧高之
雅編之史冊無愧伊訓說命之書自親見之民生幸甚

某謬司井絡久屬秦階矧竊聽于黃麻喜欲磨于綠竹
丹心報國敢忘雨露之深恩白首逢時未分江湖之終
老

代蜀總賀興元丁帥除利路安撫副使

簡在上心全付方面錫馬侈康侯之庶將膺接晉之榮
執禽戒子弟之輿遂主帥師之寄觀朝廷之善處知四
境之何憂蓋嘗竊聞道路之言妄測廟堂之算謂今蜀
棧重在漢關有如蛇之首尾不可分母以鹿之犄角為

足守故雖二閩之設是特一時之宜豈能無脈絡之不
通或者謂體統之當一昔邲之役林父不能克而相之
師之儀亦無成近而授劍一令浮梁之捷聞舉扇一言
符離之事去用兵之大率如此謀帥之不專可乎以古
事言為今日賀恭惟某官兵民司命國家精神夷險屢
更惟義可以落姦雄之膽忠誠一致惟信可以服蠻貊
之心中外所恃以安宗社所倚以重比陞卿列咸侯公
歸獨以禮樂雖吾儒之至榮然在春秋于外夷而必斥

凡使華之遠有以帝眷之方深此實高祖留蕭之規少
慰周人思旦之望青羶之帳雖舊白羽之麾方新由茲
持太一之大權合子午之全勢事無肘掣機不髮容夜
雪而入蔡城今得一裴度矣春風而問浯水豈無十元
結哉某忽聆檄羽之傳不覺屐齒之折蓋敵國如一行
之上勝着在斯凡吾屬皆同舟之中安心可也

代荆閩賀沿江趙制置除煥學

北闕疏恩西清晉直東壁圖書之府載典堯章金陵帝

王之州仍分齊履詔頌元日喜動明庭恭惟某官社稷
宗臣詩書碩望關中留蕭丞相自膺漢京鎖鑰之權江
左有管夷吾盡洗晉國衣冠之陋屹一柱之山立障百
川而瀾回天險石頭有虎踞龍蟠之勢波澄淮水無鯨
喙鼉擲之驚茲膺蠖濩之知爰進凝嚴之職牙籤玉軸
式昭雲漢之文旅矢彤弓增重風寒之寄佇垂彝鼎卽
正璣衡某矍鑠一翁棲遲三峴方效祁奚之請老仍偕
文子以同升耳聽演綸心形折屐盟鷗夢斷祗憐白首

於江湖賀燕心傾徒想烏衣之巷陌

代京西漕賀沿江趙制置平寇

孽臣干紀驅烏合以跳踉王旅徂征振鷹揚而剪滅去
藩籬之允惡倖社稷之雋功吉語星馳歡聲雷動竊以
何代無姦雄之患亦惟在人
有控制之方鶴唳風前走
符堅于淝水鵝鳴雪裏縛元濟于蔡城至今談者之言
固曰偉哉之績然使一時震懼之際萬口忠來之初得
裴度則唐業賴之微安石則晉事去矣不圖今日復見

古人有如揚楚之近郊自納淄青之舊俗憂深背脅養成大厯之疽根勢類股腰更甚後元之跋盭上方廣天地之容貸彼乃抗雷霆而陸梁染蚩血于衣冠扇苗腥于城郭江帆海艦攘螳臂以欲登月戍雲屯逞豺聲而肆毒於斯時也疇克任之幸九重奮乾剛之明而十乘任泰平之責合軍于呼吸之頃決策于指縱之間折筭一筭投戈四潰恭惟某官廟堂雅量鼎鼐元勳分寶展親麟趾倚維城之重受社作輔犬牙強磐石之宗幾年

盛宇宙之威名壯志俟風雲之機會自制孫吳之鐵甕
每懷梁氏之金甌豢虎狼而拂其心知噬人而且至取
鯨鯢而封之觀期逋寇之必誅故盡護于我師即翁張
于士氣若元若石若琰勵父子兄弟之謀曰顏曰勰曰
宏協將帥賓僚之力遂騰丕績高掩前聞佛狸果斃于
卯年鬼蜮莫窺于大德月星明概霾曠清夷茲矢彤弓
盍考召公之命袞衣赤舄亟催姬旦之歸赫常武于清
朝揚耿光于後代某猥乘邊傳欣聽驛書正深斐緯之

過憂條動儒紳之喜色于疆于理佇還周官禹貢之封
可磨可鐫願肆柳雅韓碑之作

代京西漕賀淮東趙安撫平寇轉官陞職

露布奏功宸綸疏渥牙籤玉軸升書殿之清班紫綬金
章陟文階之峻秩增十連之重寄昭一代之殊勲芝誥
聯榮棣華胥慶竊臣弭非常之變是必有非常之材建
甚盛之功亦宜加甚盛之典遙觀在昔肆伐于淮東山
歸勞而榮以袞衣江漢來平而錫之旅矢淝水風聲之

役予封邑于旦伊蔡城雪夜之師加大夫于古道每切
仰景光於前代不圖見休烈于清朝自夫楚國之亡猿
久矣漢人之養虎負恩于紀攘螳臂以當車衰兕鞠頑
逞蜂腰之辱斧不藉泰山四維之力孰護長江千里之
寒鋤其疽根洗厥妖祲今有勲焉如此顧何賞以報之
恭惟某官勁氣摩雲精誠貫日立狂瀾之砥柱駕長風
之孤騫慷慨事機蓋出父子兄弟之素志勤勞王室允
為將相文武之全材華夷知萬福之威名士卒想臨淮

之氣色踞鞍上馬期慰河南老父之思擊楫中流勉徇
江東人士之望出星門而仗鉞指蒲澤以麾戈並轡載
馳協鵠鷁之禦侮援桴一鼓隨梟獍之就殲風霆倏其
震揚宇宙為之明概宜頒異數用答殊勞未誇簞篋鏤
錫之有光盍取鼎鼎旂常而載紀繪功建武重瞻寇鄧
之丹青作雅元和丕邁柳韓之金石某猥乘邊傳欣聽
驛書實闕宗社之閔休匪但門墻之私慶緬懷風景豈
嗟有異之山河想見官軍可冀中興之日月

代京西漕賀淮東趙提刑平寇進職

獻捷戎車持斧上繡衣之最升班書殿花金下紫綬之
榮官名應同穎之禾慶事聯華萼之棣渙頒成命鼎沸
歡謠嘗觀古人伯仲之間其在前代勲名之盛庾亮之
有庾翼僅更鎮于武昌謝萬之與謝安應同時于淝水
蓋未有二惠競爽一體共功並轡載馳躬提熊虎之旅
麾戈並出手戮鯨鯢之女奠安宗社之基圖淨掃乾坤
之氛稜捷無虛月賞不踰時並膺甘茂之十官俱受子

展之三命竹帛未之有也縉紳孰能任之恭惟某官三
光五岳之英千載一時之瑞尅神州戮力王室皦皦威
心濟大江誓清中原凜凜英氣早著西平之有子允宜
北顧之無憂江左衣冠見夷吾而釋慮淮南兵甲賴長
孺以寢謀屬狡焉失稂莠之薈而蠹爾逞蜂蠱之毒恣
其兇虐速我誅鉏遂勤天討之師爰問鬼誅之惡星軺
夙駕露布朝馳翁令腹敗以枝披盡使草薶而禽獮金
平雨矢未誇武安兄弟之勲采石風帆復見雍國文武

之略功成不世報以何官宜紅旗之捷奏未幾而黃紙
之除書並至歌江漢之是似已裕父功賦東山之盍歸
佇恢王業某濫乘邊傳倏聽郵音誕揚千載之景光歡
動三軍之舊部縛賊奴而取金印恨莫陪橐弭于其間
與兒童而唱銅鞮但喜同車書之有日

代荆閩賀交代趙侍郎除京湖制置

凝旒親擢授鉞專征紫橐遙朝甫奏淮頭之新捷碧油
建閩載臨峴首之舊封郵音四傳士氣十倍竊考三軍

師帥之重見諸一門父子之榮趙孟繼成季之勲晉典
刑之具在李愬踐西平之鎮唐功業之獨隆蓋世德之
素孚斯羣心之攸屬欣逢盛舉夔掩前聞恭惟某官三
光五嶽之竒四海萬人之望謂故園心有喬木挺挺高
風濟大江誓清中原凜凜英氣早佐籌帷之畫諾已寬
宸扆之顧憂中外幾年始終一節比孽臣之干紀總王
旅以徂征並轡載馳投戈四潰既侈京觀鯨鯢之戮甫
趨禁墀鵠鷺之班時適西風憂軫丙夜雖江左賴夷吾

而無慮然襄陽正叔子之興思遂輟貳于六卿俾盡護
于諸將麾幟士卒一毫無更城郭人民重來如故耀焜
弟兄之華萼摩挲父老之甘棠碎轅輜破宮廬佇掃清
于朔漠書旂常銘彝鼎即入輔于昕朝某賦分癯儒受
知先哲護風數處歎若汗青歷星一終頽然頭白久困
榆邊之酬應屢陳苔雪之歸休凡而營壘之間盡循諸
葛不料藩籬之外又生一秦正綿力之勉支忽綸言之
誕播金蘭益締糠粃曷虞占城上之赤雲已卜歸期之

近望關中之紫氣不勝候吏之瞻

代荆閩賀趙都丞除京湖制副兼京西漕

絲綸錫渥軺鉞登庸次對邇班密布樞機之旨元戎小
隊交輝禮樂之華新命倣傳舊封肆悅眷乃一門之盛
見之再世之間淮南迭居如贊皇之父子武昌繼踵若
元規之弟兄然相與以並為乃昔無而今有縉紳創見
竹帛增光恭惟某官蓋代奇材濟時雅志心有如日常
存宗社之謀義不共天素得家遑之論早自擅裘之獨

獺已先介冑以馳驅屢更險夷一致忠孝比楓宸之授
節指蒲澤以麾戈雪壘夕馳露布朝奏几梟獍底就殲
之速皆鵠鷁專禦侮之勞笳鼓賦歸甫息淮堧之覆羽
書告遽忽騰蜀棧之烽上懷叔子之威名士想臨淮之
氣色遂懸帷幄來建閫臺江山形勢嘗得之目中錢穀
甲兵可運之掌上一麾白羽盡復青氊北平之氣無雙
固邊人之素服鄴侯之功第一看史冊之相輝某老不
如人久焉懷土徒以受令公之薦尚茲守忠武之營萬

里封疆不料鄉鄰之警十年精力徒傷風景之瞻幸二
惠之肯來庶一癯之知免國事幸甚造物界之入玉門
闕豈望賜環之寵歌銅鞮陌欣聞挾纊之聲

代京西漕賀趙都丞除京湖制副兼京西漕

謀詩書帥遣禮樂臣密旨布宣次對屈松階之履使權
浴度元戎連蓉府之鑣郵音四傳士氣十倍竊以奕代
典刑之懿載稽昔賢勳業之隆李愬踐西平之官猶詫
唐人之父子庾翼繼武昌之鎮尚誇晉世之弟兄况夫

踵闕閱之英規聯閭臺之逸駕於昭盛美實掩前聞恭
惟某官文武全材社稷偉器千載英靈之氣飄飄如雲
一門忠孝之心皦皦猶日早贊庭帷之畫諾已寬廊廟
之顧憂險夷百為始終一節比以金甌之幾玷有勤繡
斧之徂征雪鵝夜馳風鶴朝奏甫賴淮南之汲黯屬懷
江漢之召公謂湟水羌人尚畏後將軍之策而鎮州士
卒猶存先太師之衣茲樞機輟紫禁之班而軺鉞問青
羶之舊江山好在壁壘麾幟之無更日月幾何城郭人

民之如故目眄五原之草綠指揮萬竈之粟紅破穹廬
碎輓輜一掃黃龍之磧清廟貌定鐘虞重申白馬之盟
看手拍於銅鞮腰懸於金斗某絕微壽略猥玷詎謀
數載春陵髮為之白一來襄岷笑未及黔適當擊柝之
時旋玷子環之寵欣聆除目幸締交盟雷動歡聲頓釋
藩籬之過慮海函宏度庶無糠粃之遺羞

代京西漕賀全大監除京西提舉兼制參

彤墀疏寵玉節陞華省監聯班將建小雅修車之績閭

轅佐畫豈惟太史平準之司郵音一傳輿頌四達恭惟
某官器全王佐名冠時流抵掌論兵皆暗合孫吳之略
抱膝懷古有自比管樂之心早曳裾而客諸侯即折筮
而制千里春容談笑之頃慷慨功名之津入奉廟謀平
楚首來於劇孟出參軍事却秦盡出於仲連坐揚天討
之師立正鬼誅之惡既騰露布游陟星闌屬懷蜀棧萬
里之憂尤重襄城上流之勢謂二三豪俊久相與於籌
帷有百萬甲兵蓋莫如於武庫載塵使事誕布皇靈草

木皆知於威名壁壘喜聞其氣色佇恢謨略弘濟艱難
玉帳借籌暫屈轡絲之攬金印如斗亟看笳鼓之歸某
弩未技窮刀頭夢切慨念星霜之久精力為殫顧瞻夙
景之殊意料不及茲忝子環之命適丁擊拆之時忽聽
除音頓強懦氣願言長策亟澄江漢之波庶俾陳人早
問邱園之隱

代蜀總賀桂侍郎除四川制置

紫橐聯班綸綺布王言之命碧油易鎮詩書膺元帥之

謀封疆兼四履之雄中外有九鼎之重先庚倣播旁午
歡聲敢因名氏之通略叙兵民之繫若時西土在國北
門自惟往歲狐鼠之姦甫覺連年鴻雁之集邊牧倏侵
于春草戎亭屢警于夕烽雖廟算之全安致老酋之斃
去而且苗腥汚於隴右虫血漬於中原失火殃魚藩籬
恐及傷弓驚鳥家室為憂若在自治之方無出不爭之
策然闕堡有齒唇之必守而蕭牆有心腹之當防不有
人焉孰為國重恭惟某官兩朝碩德千載真儒典刑大

雅之遺音學問中庸之至性青山三百疊真人傑以地
靈丹桂五枝芳由源深而流遠自膺分月即委護風宣
流畫戟之仁聲振厲繡衣之精采一塵無聳已寒朔幕
之氈十乘有行未暖渚宮之席屬時宵旰遠顧岷峨謂
裔夷又起于一秦而將略可無于諸葛遂躋郎位亟涉
卿珪載登枚徐侍從之班正重周召方伯之寄夜觀奎
壁煥寶儲次對之躔春到井參偉玉帳前籌之智自是
定四維安疆之計為萬里掃清之期聞范公而西賊驚

何憂疆場相司馬而遼人戒佇位廟堂其一總賦輿屢
踰歲籥瓶之罄矣莫供漢柳之屯旌以招之許問吳松
之釣伊昔托鄰于玉水今將識面于寶屏書下日邊喜
同雪外雖烏檣已辨巾車欲問于田園倘馬首可瞻聚
米願陳于山谷遲吾行也猶及見之

代襄閩賀黃漕赴召除卿師成都

渙頒宸綍晉陟卿珪不俟駕而行甫聽四牡使臣之勞
毋疾驅有詔復膺三軍元帥之謀偉中外之歡聲仍山

川之舊壤恭惟某官清廟鍾呂明堂棟梁學問續諸儒
之燈文章傳萬古之印剛弗吐柔弗茹山甫高風撓不
濁澄不清叔度偉量自指錦宮而弭節已兼玉帳以殿
邦臺閭七年金湯增重岷峨半壁桃李成陰上方予環
以名之公已趣裝而下矣星輶南指謂遼東之白鶴且
還月掌西升奚闕上之青牛再去意者蜀道天難之險
靡容雪山人去之輕遂留蕭何行且殿四封之重無過
戴胄豈徒持三尺之平雖是行少緩于登仙恐不日爰

立而作相某身縻闡寄心荷襟期聽俶播之好音覺倍
明于老眼記慈恩五百人之列喜最號于得人望少城
幾千里之遙恨莫陪于賀客

代賀四川桂制置除煥學

碧油奏最丹綉疏恩元日路朝方聳羣后奉璋之聽清
時冊府載司寧王遺寶之書偉學士之華班表帝心之
隆眷一新明命四達歡謠恭惟某官禮樂鉅儒典刑大
雅早負經綸之志出逢熙洽之時戮力神州小江左夷

吾之志盛心王業繼隆中諸葛之規自繡衣往鎮于淮
濱逮葺纛載臨於荆渚赫然偉績簡在膺衷獻納聯班
爰荷彤墀之索詩書謀帥遂分玉壘之弓顧當虛疑瀕
洞之餘首用安靜和平之策張忠定一箇信人心隨見
于感孚范老子百萬兵敵膽已聞于驚破茲化日春熙
于井絡而胡星夜落于軍營門戶藩籬匪特壯青天之
險介胄干櫓無非用黃石之柔挽回蜀道之難屹作雪
山之重宜陞奎象仍護參墟勒孟陽劔閣銘佇紀功于

彝鼎上王褒益州頌即正位于啓廊某久荷化鈞欣于
宸綉矧厠雁鶩行之列敢忘燕雀賀之私闕中之蕭相
復留願竟成于勲業潁川之許丞未去尚終賴于寬弘

代京西漕賀湖北趙漕

妙東上心肅將使指金鑾入奏方聯蘭省之班玉節蜚
來仍轉柳營之餉臺綱倣振輿頌翁歸恭惟某官帝室
宗英儒林師匠丰標立千仞之壁議論回百川之瀾學
問淵源傳武夷之正印性命道德續伊洛之遺燈故凡

平時施設之方盡出諸老講明之素分符楚戶尚懷細
候竹馬之思攬轡夔門孰訪忠武木牛之略繼興思于
宣室爰上計于甘泉含雞舌之香浸階清要接豹尾之
武盍罄論思時惟洞庭彭蠡之濱莫急金城湟中之漕
遂迂熟路來駕輕車席上過師毋薄青氊之舊樓前訪
古細賡黃鶴之吟恐墨突之未黔有漢泥之即紫某守
邊罔效乘傳踰涯正虞寄重于喉襟其孰勢聯于唇齒
前旌相望後纍何憂築壽昌之邊倉恨未知于奇畫繼

鄴侯之糧道願俯示於良規

代賀京西朱憲除閣職

麾輶奏最編綉疏恩道家蓬萊之山峻躋華直方城漢
水之地仍總使權封圻無前日之殊父老有暮年之借
洊頒巽命允穆師言恭惟某官與學淵渟孤標山立博
通古典不遺九邱八索之書涵咏聖經一洗諸子百家
之說赫奕金城之上計光華玉節之乘邊羶蜀畏威夜
落旄頭之焰衣冠垂象曉澄貫索之輝遠颺九重欽恤

之仁益聳一道澄清之譽猶君奭分陝召南之化盛行
而季梁在隨漢東之國為大宜膺芝誥爰與竹書光照
奎壁之文章位重隰原之禮樂佇歌四牡既覲六龍某
久竊餘光欣聞成命代庖越俎方虞駑乘之貽羞攬轡
登車尚賴餘波之借潤

代京西漕賀李工書

疇咨首諫晉陟都臺訓飭邦工爰掌冬卿之典緝熙帝
學密陪昕暉之遊郵音肆傳輿論胥慶恭惟某官氣涵

剛大識造精微蘊開物成務之才抱尊主庇民之學一
時星鳳正中朝人物之英千載雲龍乃南陽帝鄉之彥
外庸早著上春素深旋步武于周行即王盟于公論烏
臺執憲備更三院之朝儀騎省封囊屢補百張之諫紙
盡行所學無隱不言人主為霖于威顏天下想聞其風
采夙夜獻納宜陞畫省之班日月就将仍侍金華之講
翊成君德興起治功聽文石之履聲難淹步武調泰階
之鼎鉉佇倚經綸某誤攬轡絲欣于制綉雁門遣戍正

虞數處之護風燕厦傾心庶賴萬間之此雨

代京西漕賀錢秘監兼侍講

渙恩楓宸晉長蘭臺馬融三入之榮盛推東觀丁鴻五
論之講密侍北宮真儒者之至榮螿輿情而胥悅恭惟
某官儒林根柢藝苑精華續性命之遺燈振聖賢之餘
響文章藻麗有三代兩漢之風學問淵源洗諸子百家
之陋外庸早著上春久隆由驥足之來旋即駕行之闕
步太乙青藜之閣爰屈校讎中書紫微之垣久瞻儀羽

茲任大蓬之寵式彰丹扆之知虎觀曉趨帝學賴緝熙
之益麟臺晝直皇猷資黼黻之工已聯論思獻納之班
佇錫輔相弼諧之命某遙分使傳欣聽德音引領蓬萊
知是幾塵之隔依身厦屋庶無凌雨之憂

代京西漕賀趙侍御除大諫

疇咨橫榻峻陟上坡聖天子從善如流久資風憲諫大
夫憂國猶渴式罄箴規御筆親除儒紳交慶恭惟某官
氣涵剛大學造精微著龜彰先見之明金石厲匪躬之

節閉邪陳善竊自比于孟軻正色立朝咸謂今之汲黯
外庸早著上春素隆由步武于周行即主盟于正論五
花天近聳嵯峨之威稜兩栢霜凝振乘驄之精采中外
為之嚴憚朝廷賴以尊安有三代遺直之風再瞻清獻
當八年敢言之日允賴陽城喜賡慶歷之歌詩更費元
和之諫紙益殫剗論共起太平想集書囊作漢文之帷
障倚持色線補虞舜之衣裳某誤攬轡絲欣聆制綉當
日月之亭午坐底陰消誦江漢之朝宗願祈海納

代京西漕賀何宗博除正言

龍墀渙渥騎省升華正色立朝重見元和之諫紙真賢
得路共賡慶厯之歌詩吾道光亨太平立致恭惟某官
氣涵剛大識造精微抱開物成務之才存陳善閉邪之
敬慷慨論事賈誼陸贄之流鯁切愛君魏誼王珪之右
外庸早著上春久隆粵登駕序之華甫典麟宗之籍屬
時當寧勤八年望治之心咨我正人賴一言興邦之益
爰資鴻碩來訂歲規白筆抗詞士想聞於風采青蒲入

奏上必霽于威顏朝端愈見于清明國勢佇期于寧謐
身倚文石奚拘一月之上封目送延英不待數年而入
相某遙分使指欣聽除書數處護風正雁門之遣戍萬
間茫雨惟燕廈之傾心

代京西漕賀陳少監兼殿講

中宸疏寵內殿論經五兵法度之嚴甫推武庫三代詩
書之彥宜在講帷除當四博士論胥慶恭惟某官詞林
宗匠治道津梁續性命之遺燈振聖賢之餘響文章典

麗有三代兩漢之風學問深純洗諸子百家之習蚤逢
熙洽妙東眷知槐市橫經久積師儒之望蓬山接武寢
升臺省之班茲由戎監之華爰侍細氈之讀書聖問而
付史館丕邁昌朝成君德而在經筵式資正叔由是替
緝熙之學此其為輔相之基紫荷立登白麻可俟某遙
分使傳欣聽除音數處護風正雁門之遣戍萬間芘雨
惟燕廈之傾心

代賀陳洋州

黼座疏恩朱轡作牧十年出幕府望久積于旌麾千里
得湖山令將新於庭戶嵒家重東流之地漢闕寬西顧
之憂金湯有人紳笏昏慶恭惟某官閭苑錦屏之秀雪
山玉壘之英自卧大床元龍有湖海之氣安事一室仲
舉非塵埃之人自驥騁于康衢即鵬搏于溟渤以身徇
國豈存忠孝之規趨事赴功靡擇險夷之任談笑河陽
之幕從容單父之琴月駕佐邦清徹一盃之水星臺贊
餉飽供萬竈之烟士方相為斯世勲業之期上盍趣登

中朝獻納之選屬時劍棧重在洋川南褒北斜直指子
午之谷前隴後蜀正嚴戊己之屯遂膺玉帳之剡聞亟
畀銅符而作鎮山川人物既素得於目中保障繭絲斯
可運于掌上茲未促行春之駕果已騰來暮之謠石硯
牙籤細和詞人之佳句橙亭秋浦重尋賢守之舊遊第
朝廷已深知于弱翁恐郡國難久屈于黃霸靡需黔突
即渙紫泥某癡未了官少寧更事一行作吏已慚揚州
梅閣之吟再轉為丞尤愧藍田松庭之記雖凡骨勉期

于丹換而俗容尚費于藥醫碌碌家庭見謂厥菑而弗
播棲棲歲月直成不稽以取困政有畏于簡書乃獲承
于祭戟庶依召父未去許丞母失名譽善事上官尚當
謂大府而受約束豈無他人不如同姓庶期知廣廈之
為旰蒙

可齋雜藁卷四